

1 PEDRO

É Kálara Ósúá Apostol Pedro a ngá tsili

Mbóló

1 ¹Ma Pedro, ápostol Yesukristo:
Ma tsili ébá bé tɔɔ beyɛŋ ya myeann á Ponto, á Galasia, á Kapadosia, Ásia, ya á Bitinia, ²mitɔɔpbán amvála ané Nzamá Éséá a ngá tára yem, ébe ntélán eki ye á Nsísim, mfá ábɔ mewók ya ábɔ myamann ya mekií Yesukristo:

Mvɔmm ya mvwaá bí bera mína kɔgle.

Olugú ya Nzamá

³Olugú ó bɔɔge ya Nzamá, Éséá Ntí wea Yesukristo, éñí, amvála ané abwiññ nyénánn engóngɔɔ weñ ó ne, a ngá bɔ bía ná bí bera byála ná bí belé óyan ó ne ntétéá amú nwómán miwúán Yesukristo, ⁴mfá áñɔŋ tsígá e ne kaa ábweñ, kaa mvin, ngé ki kaa mana, éñí bé nii yaá á dzóp été mfá wenan, ⁵mína é bot míní ne mbaalann ya é nguu Nzamá amú mbwínánn, mfá ákoroga é ntɔɔ yaá nkomann ná wá ye yéne é tám da sùgan.

⁶Dzam te édo mína bíra sán ya do, ngé dá yian ná, atwaa áwola dí, avítsaŋ tám, míní yén midzuúk ya mebólé memvála ya memvála, ⁷á mfá ye ná nkyabán míkat ye á mbwínánn wenan, é dzóm dá daŋ ye eban álot kɔŋ éñí dá wú ntuk, atwaa bá kyak wó ya ndúán, ná bé koan ya wó ya olugú, ngaŋŋ ya dúmá éyɔŋ Yesukristo aa ye váma.

⁸Éñí mína dziŋ kaa ná míní yén yaá ñí, éñí míní téa, ve mína bwíni ñí, mína sán ya mésán bé sés kúlu ánu, mé tɔɔ fe ya dúmá, ⁹míní wún asúgánn ye mbwínánn wenan, dá yíli ná, ákoroga denan.

¹⁰Mfá akoroga te, bekúlu medzó bé ngá kúlu medzó ébe mvɔmm e ne ntélán mfá wenan, bé ngá fas ya átúga dzén, ¹¹béé bíli mot mbé, ngé tám fé Nsísim Kristo ó ngá lére bó été, éwí ó ngá tára vé ngañiá ye mídzuúk

Kristo ya é dúmá dá belan véa. ¹²Ébó é ngá léreban ébe bó ná, é sés éedeaba, ve éedeaba, mfá é mam bé nga kat ya bía mbamba fwéñ éndagá ya nguu Mfúfúp Nsísim a ngá só á dzóp; éma baángel bá ñamle ná bé yén. ¹³Édo ná, télegán ásimánn denan nkomann, tɔbɔgán ya kén, belégán mebúnn menan mése ébe é mvɔmm e ne mína mvéán éyɔɔ Yesukristo aa ye váma.

Mfefeñ eniɲ

¹⁴Amvála ané é bwán bé ne mewók, míní taa yébe míkómánn míní ngá tára belé míní tɔɔ á ndzímán wenan été; ¹⁵fáve ná, amvála ané éñí a ngá lwée mína ñí a ne eki, mína tɔbɔgán fe eki amvála étɔɔ denan áse; ¹⁶amú é ne ntsilann ná: “Tɔbɔgán eki, amú ná Me ne Eki.”

¹⁷Ngé mína yónán ya éñí a ne Éséá, éñí aa kík misaɲ kaa áke ya mot enziɲ ngamm, amvála ané mbɔann kada mot ó ne, edé tɔbɔgán á wɔɲɲ été ébe é tám míní ngén mína wulu á sí ó vá; ¹⁸míní yem ná míní ndzí koroban ya é byém byá bweñ, ané ngoós ngé ki koɲ, ébe ámvála nzeze eniɲ denan, éñí míní ngá ñɔɲ tsígá ébe beésúá. ¹⁹Fáve ná, ya mekií mé ne táɲ ndén, ané éma é mwann ntómá a ne kaa eyém, kaa ki ya meyeɲɲ, Kristo. ²⁰Ve déá, éñí bé ngá tára yem, kaa ná eniɲ é téñban, ve métám méye ásúgánn má, a só yaá yéne ákála denan. ²¹Mína é bot mína bwíni Nzamá ya ákála Dén, ná Nzamá aá wómo ñí míwúán été, éde a ngá vé ñí dúmá, á mfá ye ná óyan wenan ya mbwínánn wenan bí tɔbɔ ébe Nzamá.

²²Éde éyɔɲ mína bɔ bébélá mewók, míní tun yaá mína bébyen, mfá édziɲɲ bɔbéñaɲ é ne kaa meduk; dziɲɲán bevɔɔ ya ébá bevɔɔ ya édziɲɲ bɔbéñafwáa dá só fe á nlém ósí. ²³Míní ndzí bera byála mfefeñ mbyálánn ye é mvɔɲ dá bweñ, fáve ná éñí e ne kaa ábweñ; amú éfiá Nzamá é ne ntétéá é tɔɔ fe mbéámbéá. ²⁴Édo ná,

“Mot binam áse a ne ané elwá,
é dúmá deñ ése dá ané samm ye élwá.
Elwá dá kót, samm da é kpéñ,
²⁵Ve éfiá Ntí dá laɲan eyɔɲ ése.”

Édo ná, éfiá te édo dá bé ngá kat mína ya do mbamba fwéñ.

2 ¹Édo ná, míní mana vea abé áse, meduk mése, mvoo, miñamle míse ya nkóbo abé óse, ²ábíran kómo ñá meñáɲ méye éfiá, amvála ané mikéɲlé mí bwán mí ndem byála á mfá ye ná, ya émo míní vém mfá akoroga, ³ngé míní kyak yaá ámvála añep Ntí a ne.

Ákwá é ne ntétéá

⁴Éde míní nzu ébe éñe, ákwá é ne ntétéá, afáɲbo ná bot bé ngá tep do, ve ósú Nzamá é ne ntópbán ya ábíra do vé ngaɲɲ. ⁵Mína fe, amvála ané

mékwá mé ne mitétéá, tɔbɔgán nlóŋán ané ndá ye á nsísim mfá éséññ befára é ne ntélán eki, ná bé vé metúnŋa méye á nsísim, é má Nzamá aa yebe amú Yesukristo. ⁶Édo ná, é ne ntsilann ná,

“Dággán, ma téle akwá á Sión,
Ntɔpbán ya ábira do vé ngaŋŋ,
Édí dá dan ya eban mélón,
É mot aa ye ní bwíni, áá ye wú osoán.”

⁷Éde mfá wenan, mína é bot mína bwíni, é ne ya ededea eban; ve mfá ébá bá bé ne kaa ábwíni,

“Akwá belón bé ngá tep,
Dá é nzu yaá veŋan ákwá dá dan ya eban,”

⁸Ya fe:

“Akwá dá kóp obaá, ya akóm bá sen áyóp.”

Bá kɔp obaá amú ná bá bɔ efíá meló, mfá dзам te édo fe bé ngá téle bó.

⁹Ve mína míní ne áyɔŋ é ne ntɔpbán, nsámá befára Kéza, nnam ó ne ntélán eki, é bot Nzamá mfá weñ, ná amvála te, míní kat biyágán bí mam éñí a ngá lwée mína ó dzíbi ósí, ná míní ke é bora eyéá deñ été; ¹⁰amú ná mína, míní mbé bot benziŋ, ve éndagá míní ntɔɔ é bot Nzamá. Ébá eé ndzí tára yén engóngóó, ve éndagá á ŋga yén yaá bó engóngóó.

¹¹Á míndzindziŋ mí bot, ma bíra mína lép amvála ané beyéŋ ya belot nzenn, ná míní dzɔgo mbéa míkómánn mí bot, é mí myá lúman ya nsísim. ¹²Tɔbɔgán amvála é ne mvéáñ, énzénzanŋ bot béye meyɔŋ mefé, á mfá ye ná ébe é mam bá sómán mína ya mo ané bembéa bé bot; ya ákála é mbamba mibɔann myenan éyɔŋ bé ñú yaá myo tán, bé vé Nzamá dúmá é mos aa ye nzu kí k misanŋ.

Ábɔ bidzwée mewók

¹³Kpáán bidzwée bíse bí ne é sí ní ásí, akála Ntí; ané bɔ kéza, a tɔɔ ané ndzwée, ¹⁴ngé ki bengóvina, ébá bé ne milómán amú éñe, á mfá ye ná é bot bá bɔ abé bé vé bó mekira, ve ébá bá bá bɔ mvéáñ bé vé bó olugú. ¹⁵Amú ná nkómánn Nzamá éwɔ wí: míní bɔ mvéáñ, míní dzíp ménu midzímánn mí bot mí ne kaa fak;

¹⁶míní tɔɔ filí, ve kaa ábelan ya etɔɔ filí denan ané ebúrua á mfá ábɔ abé, fáve ná belagán ya do ané áloá Nzamá. ¹⁷Sémenŋán mot áse, dziŋŋán bɔbéñɔŋ, kɔgán Nzamá wɔŋŋ, sémenŋán kéza.

É mam aloá dá yian bɔ

¹⁸Á bébɔ biséññ béye á ndá, kpáán bémása benan ásí ya ngaŋŋ ése; se fáve ébá bé ne mvéáñ ya ébá bé ne añep, fáve ná ya fe ébá bé ne bembéa

bé bot. ¹⁹Amú ná dzam te dá nzu ya mvɔmm, ngé amú ósímánn ye á nlém ósú Nzamá mot aa dzíbi mam eé yén midzuúk ékúkwát été. ²⁰Akála ná, nzá abúánn é ne été, ngé mína dzíbi eyíra amú nsémm? Ve, ngé mína yén midzuúk amú ábo mvéáñ, míní dzíbi dɔ, dzam te dá nzu ya mvɔmm ósú Nzamá. ²¹Amú ná ya dzam te édo míní ngá lwéeban ya dɔ, amú ná Kristo ní a ngá dzuk fe ákála denan, a lík efonann ná míní bee bíbógá mébo byeñ.

- ²² “Éñí eé ndzí bo nsémm,
meduk menziŋ má béé ndzí ki koan ya mo ánu deñ”;
²³ Éñí é tám bé ngá tea ní,
ní eé ndzí yalan ya meteá;
é tám bé ngá ndágle ní, ní eé ndzí bo elan,
fáve ná a ngá kee dɔ ébe éñí aa kíŋ misaŋ tételé;
²⁴ Émyen éñe a ngá ke ya mísémm myea é ñúu deñ á krús,
á mfá ye ná bí wú ébe mísémm myea,
bí niŋ tételé éniŋ;
amú ná míní ngá sénban ya mévéŋ meñ.
²⁵ Amú ná míní mbé amvála ané mítómá mí dzími yaá nzenn,
ve, éndagá míní búlán yaá ébe Nkálá mitómá ya Ntébosú wenan.

Adzó mélúk

3 ¹Amvála te fe, biningá, kpáán beñu béyóm ásí, á mfá ye ná atwaa ngé bevɔɔ benziŋ bá bo efíá melɔ, bé ne wúnban kaa efíá ya amvála beyéá bá niŋ, ²béé yén ané mína niŋ ya wɔŋŋ ya ngaŋŋ. ³É ñaŋŋá denan dá e táa ki bo átán; ndzilann miló ya mbwátán byém bí koŋ, ngé ki bítóp bí ne táŋ ndén, ⁴fáve ná ñaŋŋá ye á nlém mot été, éñí e ne kaa ábweñ, éñí ye nsísim ó bóo ósí ó dzaga fe, édo dá daŋ ya eban ósú Nzamá.

⁵Amú ná néa, tám fé, mífúfúp mí biningá mí mbé fe mí belé mebúnn ébe Nzamá, myá mi ngá bo fe ñaŋŋá, béé ku beyóm ásí. ⁶Amvála te, Sara a ngá bo Abraam mewók, eé lwée ní ná Ntí; ébe éñe míní nzu yaá bo é bengwan béñ, ngé mína bo mvéáñ, kaa áko dzam enziŋ wɔŋŋ.

⁷Amvála te fe mína beyóm tɔbɔgán beñu beyéá á nyemann été, amú ná miningá a ne é mot aa daŋ ya ateák, míní vé bó ngaŋŋ ané beñɔŋ tsígá béye mvɔmm ye éniŋ, á mfá ye ná meyaglán menan mé bo kaa átoɔ ndzipbán.

É mam bebwíni bése bá yian bo

⁸Éde mfá ámana, mína bése sé belégán amvála nwóránn avɔɔ, áyén bot engóngɔɔ, ya edziŋŋ bɔbéñafwáa, ya añep, nsilibán ósí, ⁹kaa ábúlu abé ya abé, ngé ki biboŋ ya biboŋ. Fáve ná míní vé abwará, amú ná míní ngá lwéeban á mfá ánzú ñɔŋ abwará. ¹⁰Amú ná,

“É mot aa kómo dziŋ eniŋ ya áyén mbamba melú,
 á biñŋe é dém deñ mfá abé,
 ya biyéá byeñ ná a nzá kóbo meduk;

¹¹ á kólogé ábé été, á bo mvéáñ,
 á dzéŋŋe mvwaá, a bée dɔ.

¹² Amú ná é mís Ntí má daga benzósoó bé bot,
 meló meñ má má béá ndzaá weba,
 ve ásu Ntí é ne é bot bá bo abé á ngamm áyát.”

¹³ Éde nzá aa ye mína dzugu, ngé mína bíra dzéŋ é dzam é ne mvéáñ?
¹⁴ Ve ngé mína yén midzuúk akála édí é ne tételé, bibwárán ya mína. Ve
 míní táa bó ko wɔŋŋ, ngé ki áfógan, ¹⁵ éde ná, Kristo Ntí, télegán ní eki
 mílém myenan été, tɔbɔgán fe nkomann eyɔŋ ése mfá áyalan ya é mot
 áse a dzaa mína ákéá á mfá óyan wenan. Ve bɔgán dɔ ya evwévwé nlém
 ya fe wɔŋŋ, ¹⁶ míní belé mbamba ósímánn ye á nlém, á mfá ye ná é bot
 bá kóbo é mbamba ntɔbán wenan ébe Kristo abé, bé wú osoán.

¹⁷ Amú dá daŋ ya mvéáñ ná o yén midzuúk akála ábo mvéáñ, ngé é ne
 nkómánn Nzamá, ye ná o yén midzuúk akála ábo abé.

¹⁸ Amú ná Kristo, nzósoó mot, a ngá dzuk eyɔŋ evɔɔ
 akála misémm bikúkwát bí bot,
 á mfá ye ná a ne ke ya mína ébe Nzamá,
 a tɔɔ nwúán mison,
 ve ntétéá á nsísim été.

¹⁹ Éwo fe o ngá ke kat fwéñ mísísim mí mbé á mbok. ²⁰ Émí mí ngá bo
 meló, é tám ó mvús, édzíp Nzamá deé yana melú Noé a ngá lónj árka, éñí
 avítsaŋ bot, dá yíli ná bot mmom, bé ngá tɔbo nkoránn ya mendzimm.

²¹ Ndem te édo é ne éfonann ye nduubán wá koro bía éndagá, (se
 mvéán mvín ye ó ñúu, fáve ná eyalann ye á mbamba ósímánn ye á nlém
 ébe Nzamá), amú nwómán miwúán Yesukristo, ²² Niané a ngá bét á
 dzóp, a ntɔɔ á mfá méyóm Nzamá, éñí á mbelé édzwée ébe baáŋgel, ya
 bidzwée, ya menguu.

4 ¹ Éde, amvála ané Kristo a dzuk yaá á nson, mína belégán fe amvála
 osímánn te ovɔɔ, amú ná é mot a dzuk yaá á nson été, a mana yaá
 ya nsémm, ² mfá ábo kaa ániŋ míkómánn míye á nson été, é tám é lígi
 yaá wa é sí ní, fáve ná ániŋ a nkómánn Nzamá été. ³ Amú ná é tám e
 ngá lot é yian yaá mfá ábo míkómánn bot béye meyɔŋ mefé, éñí míní
 ngá wulu á tugá été, bivéé, mbéa miñamle, áfían meywa, mbéa mefét bá
 yénán befám ya biningá, ya mbéa nkaŋann biyemá. ⁴ Ébe dzam te éñe
 bá yágán ná mínáá wulu fe mínabe bó á mbéa eniŋ tugá été, éde bá kóbo
 mína abé; ⁵ bot béte bá ye ke yalan ya ébe éñí a ntɔɔ nkomann ná aa kík

miwúan ya betétéá misañ. ⁶Amú ná akála te, bé ngá kat atwaa miwúan mbamba fwéñ, á mfá ye ná ngé bá kík bó misañ amvála ané bot á nson été, ve bé niñ á nsísim été amvála ané Nzamá.

Ábelan ya é bot bevós

⁷Éndagá, asúgánn ye mam mése é ntóó bebeñ. Édo ná tóbogán ya kén, baalán fe osímánn mvwaá mfá meyaglán.

⁸Ádañdan ná mína bébyen míníí belé édziñ bóbéñafwáa énzénzan denan été, amú ná edziñ dá búru abwiññ misémm.

⁹Ñongán bevós ya ébá bevós méndá menan kaa miswa.

¹⁰Éde, ámvála kada mot a ñoñ yaá é mvomm Nzamá, á belagán ya wó eé séan ya ébá bevós ané mbamba bébaale béye abwiññ é mvomm Nzamá. ¹¹Ngé mot enziñ aa kat fwéñ Nzamá, á bósge do ané fwéñ Nzamá é né. Éñí aa belan bot á bósge do amvála ané é nguu Nzamá a ngá vé ñí; á mfá ye ná ébe mam mése Nzamá á ñoñ dúmá amú Yesukristo, éñí a ne ya dúmá, ya édzwée, mbéámbéá ya mbéámbéá. Amén.

Ásán mǐdzuúk été

¹²Á mǐndzindziñ myám, míní táa yágán é ndúán mébóblé dá nzu énzénzan denan été, amvála ané eyágán dzam é bōban yaá mína. ¹³Ve, é tóó ná mína ñoñ fufúlu mǐdzuúk Kristo, sánñán, á mfá ye ná éyoñ é dúmá Dén dá ye léreban mína míní sán fe ya abwiññ mesán.

¹⁴Ngé bá kpógo mína amú éyola Kristo, abwará ya mína, amú ná nsísim ye á dúmá, éwí Nzamá, ó nzu yaá tōbō ébe mína. [Ná á mfá weba a ne mbyanann, ve dea á mfá wenan a ne ya dúmá.] ¹⁵Amú ná mot enziñ ye ébe mína áá yian yén mǐdzuúk amvála ané nywíñbot, ngé ki ndzídzip, ngé ki mbo abé, ngé ki ané é mot aa duman éyá medzó. ¹⁶Ve, ngé aa yén mǐdzuúk amvála ané Krísten, a táa wú osoán, fáve ná á vǎ Nzamá dúmá amú dzam te.

¹⁷Amú ná á kwíñ yaá é tám bá tára nkíkǵán misañ é ndá Nzamá; éde ngé dá tára ébe bía, ásúgánn é bot bá bé ngá bō é mbamba fwéñ Nzamá meló dá ye bō á yá?

¹⁸Éde, ngé é mot a ne nzósoó aa koroban ya ndzuúk,
é mot a ne kaa áko Nzamá wōññ,
ya é mot a ne mbo misémm,
bá bá ye tébe ó vé?

¹⁹Édo ná é bot bá yén mǐdzuúk amvála ané nkómánn Nzamá ó ne, bé keegé bíníñ byeba bée bō mvéañ ébe Ntéñ byém a ne éñí bá tōbō ya ñí mebúnn.

Betébosú

5 ¹Édo ná, ma lép betébosú bé ne énzénzan denan été, ma me tɔ́ɔ fe ntébosú ya ngañiá ye mídzuúk Kristo ya fe ñɔŋngap ye é dúmá é nkún nzu kúlu.

²Baalán mbamm mitómá Nzamá éwí ó ne énzénzan denan été; míní mómɔ wɔ, se akála ntsinann, fáve ná ya nkómánn mot émyen, se ki amú ndwa ye moann, fáve ná ya mbamba nkómánn, ³se ki ané mína dan dzwée ébe ébá bé kee yaá mína, ve míní bɔ efonann mfá mbamm mitómá. ⁴Éde éyɔŋ Ndzwée bekálá mitómá aa ye kúlu, mína ye ñɔŋ é dás ye á medan é ne kaa ádzímle é dúmá deñ.

Bot bése

⁵Amvála te fe mína bendómán, kpáán betébosú ásí. Mína bésesé, sémeján bevɔ́ɔ ya ébá bevɔ́ɔ, tɔbɔgán ndzálánn ya nsilann ñúu ósí mína bésesé, amú ná,

“Nzamá aa téle é bot bé ne bingún á ngamm áyát,
ve aa vé mvɔmm ébe ébá bá sili bébyen ósí.”

⁶Édo ná síligán mína bébyen ósí ébe éwólo wéá Nzamá ásí, á mfá ye ná á bére mína ó yóp é tám deñ. ⁷Keegán ñí é dzaan áse dá kele mína milém ó yóp, amú ná éñe a kálá mína.

⁸Tɔbɔgán ya kén, tɔbɔgán fe evéveññ. Déble a ne mína á ngamm áyát, aa ke aa wulu amvála ané mgbemgbem dá ñeñ eé dzéŋ é mot aa ywíñ ntuk. ⁹Éde, ya mbwínánn, keján ñí á ngamm áyát kaa áfógan, míní yem ná bɔbéñɔŋ bá bá ke fe bá yén midzuúk ya amvála mam méte é sí ñí. ¹⁰Éde Nzamá ye á mvɔmm ése, éñí a ngá lwée mína ébe é dúmá deñ é ne mbéámbeá ébe Yesukristo, niané míní mana yaá yén midzuúk oyomm tám, Émyen aa ye mína sóŋan, aa ye mína bán, aa ye mína vé nguu, aa ye fe mína túga téle. ¹¹Éñe a ne ya dúmá ya edzwée mbéámbeá. Amén.

Máán

¹²Me ngá tsili mína é mwann kálara ñí ya ávwála é mwadzan wea má tɔbɔ ya ñí mebúnn Silvano (néa éñe ma yén ñí), meé vé mína nguu ya bifíá ya vé fe mína ngañiá ná é bébélá mvɔmm Nzamá éñe ñí, éñí tébegán été.

¹³Ékóánn bebwíni é ne ntópbán á Babilonia fufúlu mínabe bó, dá sómo mína ya fe Markos é mwán wɔm.

¹⁴Ábérán bevɔ́ɔ ya ébá bevɔ́ɔ ya ñánján memánŋ ye édziŋŋ.

Mvwaa eé bóŋge ya mína bésesé, mína bot míní ne ébe Kristo.